

**Zaključak**

**o odbacivanju Prijave koncentracije  
privrednog subjekta "w&p Milos Kamen-Beton " d.o.o. Plješevac bb., Kiseljak,  
Bosna i Hercegovina**

**Sarajevo,  
novembar, 2012. godine**

**Broj: 03-26-1-008-14-II /12**  
**Sarajevo, 27.11.2012. godine**

Na osnovu člana 25. stav (1) tačka e), člana 42. stav (2), u vezi s čl. 14. i 16. Zakona o konkurenciji („Službeni glasnik BiH“, br. 48/05, 76/07 i 80/09), a rješavajući po Prijavi koncentracije privrednog subjekta „w&p Milos Kamen-Beton“ d.o.o. Plješevac bb, Kiseljak, Bosna i Hercegovina, kojeg zastupaju advokati Zajedničke advokatske kancelarije Bojana Tkalčić-Đulić, Olodar Prebanić, Adela Rizvić i Arela Jusufbašić-Goloman, Alipašina 51, 71000 Sarajevo, zaprimljenoj dana 06.08.2012. godine pod brojem 03-26-1-008-II /12, Konkurencijsko vijeće, na 47. (četerdesetsedmoj) sjednici održanoj dana 27.11.2012. godine, je donijelo

## **Z A K L J U Č A K**

1. Odbacuje se Prijava koncentracije privrednog subjekta „w&p Milos Kamen-Beton“ d.o.o. Plješevac bb, Kiseljak, Bosna i Hercegovina, radi nepostojanja obaveze prijave koncentracije u smislu člana 14. stav (1) Zakona o konkurenciji.
2. Ovaj Zaključak bit će objavljen u „Službenom glasniku BiH“, službenim glasilima entiteta i Brčko Distrikta Bosne i Hercegovine.

## **O b r a z l o ž e n j e**

Konkurencijsko vijeće je dana 06.08.2012. godine zaprimilo Prijavu koncentracije (u daljem tekstu: Prijava) od strane privrednog „w&p Milos Kamen-Beton“ d.o.o. Plješevac bb., Kiseljak, Bosna i Hercegovina (u daljem tekstu: Podnosilac prijave ili w&p Milos KB) kojeg zastupaju advokati Zajedničke advokatske kancelarije Bojana Tkalčić-Đulić, Olodar Prebanić, Adela Rizvić i Arela Jusufbašić-Goloman, Alipašina 51, 71000 Sarajevo, kojom isti namjerava izvršiti pripajanje dijela privrednog subjekta „House Milos“ d.o.o. Ilidža, ul. Rudnik br. 115, Ilidža, Bosna i Hercegovina (u daljem tekstu: House Milos).

Konkurencijsko vijeće je utvrdilo da Prijava nije kompletna i uredna u smislu člana 30. stav (1) Zakona o konkurenciji (u daljem tekstu: Zakon) i čl. 9. i 11. Odluke o načinu podnošenja prijave i kriterija za ocjenu koncentracija privrednih subjekta („Službeni glasnik BiH“, broj 34/10 ) te je zatražilo dopunu iste, dana 03.09.2012. godine aktom broj 03-26-1-008-1-II/12.

Podnosilac prijave, u smislu člana 31. stav (2) Zakona, je zatražio produženje vremenskog roka za kompletiranje Prijave (podnesak broj: 03-26-1-008-2-II/12 dana 07. 09. 2012. godine), nakon čega je Konkurencijsko vijeće prihvatilo zahtjev i odobrilo produženje roka za dostavljanje tražene dokumentacije (akt broj: 03-26-1-008-3-II/12 od dana 12.09. 2012. godine).

Podnosilac prijave je istu dopunio traženom dokumentacijom (podnesak broj: 03-26-1-008-4-II/12 dana 27.09. 2012. godine).

Nakon kompletiranja Prijave, Konkurencijsko vijeće je Podnosiocu prijave izdalo Potvrdu o prijemu uredne i kompletne Prijave u smislu člana 30. stav (3) Zakona, dana 30.10.2012. godine pod brojem: 03-26-1-008-11-II/12.

Konkurencijsko vijeće je izdalo, u skladu sa članom 16. stav (4) Zakona, Obavještenje o dostavljenoj Prijavi (akt broj: 03-26-1-008-5-II/12 od 15.10. 2012. godine) u dnevnoj štampi Bosne i Hercegovine, u kojoj je objavilo podatke o namjeravanoj koncentraciji, te pozvalo sve zainteresovane strane na dostavljanje pisanih komentara u pogledu provedbe iste.

Na predmetno Obavještenje Konkurencijskom vijeću su dostavljene primjedbe i mišljenja od strane dva privredna subjekta, i to primjedba i mišljenje privrednog subjekta Metal-Export d.o.o. Sarajevo, A.B. Šimića 2a, Sarajevo, podnesak broj: 03-26-1-008-7-II/12 od 19.10. 2012. godine i primjedba i

mišljenje privrednog subjekta Veling d.o.o. Sarajevo, Hamdije Ćemerlića 47a, Sarajevo, podnesak broj: 03-26-1-008-8-II/12 od 23.10. 2012. godine.

Analizirajući dostavljenje primjedbe i mišljenja Konkurencijsko vijeće je utvrdilo da se navedeni privredni subjekti nalaze u vjerovnično-dužničkom odnosu sa privrednim subjektom House Milos, te da od istog potražuju određene novčane iznose, temeljem presuda Općinskog suda u Sarajevu, (presuda broj: 650-Ip-198659-11-Ip od 03.06.2011. godine i presuda broj: 650-PS-106-839-09-PS od 06.05.2011. godine).

Konkurencijsko vijeće nije ocijenilo relevantnim za ovaj predmet dostavljene primjedbe i mišljenja jer one ne mogu imati nikakav utjecaj na konačnu odluku Konkurencijskog vijeća, s obzirom da se u njima ne iznose nikakve okolnosti koje bi mogle ukazivati na eventualne povrede Zakona o konkurenciji.

Prijava koncentracije je podnesena u zakonom propisanom roku, u smislu člana 16. stav (1) Zakona o konkurenciji.

Podnosilac prijave je u Prijavi naveo, u smislu člana 30. stav (2) Zakona, da nema obavezu podnijeti zahtjev za ocjenu koncentracije tijelima ovlaštenim za ocjenu koncentracije izvan Bosne i Hercegovine.

## **1. Učesnici predmetne koncentracije**

Učesnici koncentracije su privredni subjekti „w&p Milos Kamen-Beton “ d.o.o. Plješevac bb, Kiseljak, Bosna i Hercegovina i „House Milos“ d.o.o. Ilidža, ul. Rudnik broj 115, Ilidža, Bosna i Hercegovina.

### **1.1. Privredni subjekt w&p Milos KB**

Privredni subjekt w&p Milos KB je društvo ograničene odgovornosti osnovano i registrovano u skladu sa zakonima Federacije Bosne i Hercegovine, sa sjedištem u Plješevac bb, Kiseljak, Bosna i Hercegovina, upisano u registar privrednih subjekata kod Općinskog suda u Travniku pod brojem 51-01-1703-09, sa ukupnim osnivačkim kapitalom od 2.292.857,00 KM, sa (..)\*\* učešća privrednog subjekta w&p Bautoffe GmbH, 9020 Klagenfurt, Ferdinand-Jergitsch Strasse 15, Austrija (u daljem tekstu: w&p Baustoffe) i (..)\*\* učešća fizičkog lica (..)\*\*<sup>1</sup>.

Pretežne registrovane djelatnosti privrednog subjekta w&p Milos KB su vađenje ukrasnog kamena i kamena za gradnju (kamenih agregata), krečnjaka, gipsa, krede i škriljevca, te djelatnost kopova šljunka i pijeska.

Privredni subjekt w&p Bautoffe je društvo sa ograničenom odgovornošću registrovano u skladu sa zakonima Austrije sa sjedištem u Ferdinand-Jergitsch Strasse 15, 9020 Klagenfurt, Austrija, upisano u registar privrednih subjekata kod Pokrajinskog suda u Klagenfurtu pod brojem 288433t.

Pretežna registrovana djelatnost privrednog subjekta w&p Baustoffe GmbH je upravljanje i učešće u drugim privrednim subjektima.

Privredni subjekt w&p Baustoffe u Bosni i Hercegovini ima (..)\*\* vlasničkih udjela u osnovnom kapitalu privrednog subjekta BAUMIT d.o.o., Osik 2, 71000 Sarajevo i (..)\*\* vlasničkih udjela u osnovnom kapitalu privrednog subjekta „w&p Milos“ d.o.o., ul. Rudnik 121, Sarajevo, koji prema podacima iz prijave nisu aktivni na relevantnom tržištu.

---

<sup>1</sup> Podaci predstavljaju poslovnu tajnu

## **1.2. Privredni subjekt House Milos**

Privredni subjekt House Milos je društvo ograničene odgovornosti osnovano i registrovano u skladu sa zakonima Federacije Bosne i Hercegovine, sa sjedištem u ul. Rudnik 115, Ilidža Sarajevo, Bosna i Hercegovina, upisano u registar privrednih subjekata kod Općinskog suda u Sarajevu pod brojem 65-01-0275-11, sa ukupnim osnivačkim kapitalom od 1.400.000,00 KM i sa (..)\*\* učešća u kapitalu fizičkog lica (..)\*\*.

Pretežne registrovane djelatnosti privrednog subjekta House Milos su vađenje ukrasnog kamena i kamena za gradnju (kamenih agregata), krečnjaka, gipsa, krede i škriljevca, djelatnost kopova šljunka i pijeska, te proizvodnja cementa i betona.

## **2. Pravni okvir ocjene predmetne koncentracije**

Konkurencijsko vijeće je u postupku ocjene predmetne koncentracije primijenilo odredbe Zakona, Odluke o utvrđivanju relevantnog tržišta („Službeni glasnik BiH“, broj 18/06 i 34/10), te Odluke o načinu podnošenja prijave i kriterijima za ocjenu koncentracija privrednih subjekata.

Konkurencijsko vijeće, u skladu sa članom 43. stav (7) Zakona, pri izračunu ukupnih godišnjih prihoda učesnika koncentracije je koristilo kriterije i standarde Obavijesti Europske komisije o izračunu ukupnog prihoda u skladu sa Uredbom Vijeća (EEZ) broj: 4064/89 o kontroli koncentracije privrednih subjekata.

## **3. Pravni osnov koncentracije**

Pravni osnov koncentracije predstavljaju Ugovor o kupoprodaji pokretnih stvari neposrednom pogodbom, Ugovor o načinu isplate kupoprodajne cijene i Sporazum o prodaji nepokretnosti neposrednom pogodbom, koji su sklopljeni između privrednog subjekta w&p Milos KB (kao Kupca), UniCredit Bank d.d. Mostar Ul. Kardinala Stepinca bb, Mostar, Bosna i Hercegovina (kao Založnog povjerioca) i privrednog subjekta House Milos (kao Založnog dužnika), dana 01.08.2012. godine.

Pravni oblik koncentracije, u skladu sa članom 12. stav (1), tačka a) Zakona predstavlja spajanje ili pripajanje nezavisnih privrednih subjekata ili dijelova privrednih subjekata.

## **4. Relevantno tržište učesnika koncentracije**

Relevantno tržište, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda (usluga) koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koje to tržište bitno razlikuje od uslova tržišne konkurencije na susjednim geografskim tržištima.

Na osnovu svega navedenoga, a uzimajući u obzir podatke iz prijave o predmetu poslovanja učesnika koncentracije, te posebno činjenice da je predmet koncentracije u svom pretežnom dijelu kupoprodaja sredstava koja se koriste u proizvodnji betona i kamena za gradnju (kamenih agregata), relevantnim tržištem proizvoda može se smatrati tržište proizvodnje i prodaje betona i kamena za gradnju (kamenih agregata).

Relevantnim tržištem u geografskom smislu smatra se tržište Sarajevskog i Zeničko-dobojskog kantona s obzirom na limitiranost konkurentnog transporta na daljinu koji je ograničen troškovima transporta i vremenom ugradnje betona.

Slijedom navedenog, relevantno tržište predmetne koncentracije je tržište proizvodnje i prodaje betona i kamena za gradnju (kamenih agregata) na području Sarajevskog i Zeničko-dobojskog kantona.

## 5. Analiza relevantnog tržišta

Tržišni udjeli privrednih subjekata učesnika koncentracije na relevantnom tržištu na dan 31.12.2011. godine, prikazani su u narednim tabelama:

### Tržište betona:

Tabela 1.

Red. Broj	Privredni subjekti	Učešće (%)
1.	TBG BH d.o.o. Sarajevo	(..)**
2.	AB Put d.o.o. Sarajevo	(..)**
3.	<b>House Milos</b>	(..)**
4.	Velbos d.o.o. Sarajevo	(..)**
5.	Transport beton d.o.o. Kiseljak	(..)**
6.	Almy d.o.o. Zenica	(..)**
7.	<b>Ukupno</b>	(..)**

Izvor:Prijava

### Tržište kamena za gradnju (kamenih agregata):

Tabela 2.

Red. Broj	Privredni subjekti	Učešće (%)
1.	Nexe d.o.o. Sarajevo	(..)**
2.	Bijele Vode d.o.o. Trnovo	(..)**
3.	GP Put d.d. Sarajevo	(..)**
4.	Sigma Hidrogradnja d.d. Sarajevo	(..)**
5.	<b>Hose Milos</b>	(..)**
6.	<b>W&amp;p Milos KB</b>	(..)**
7.	Ostali	(..)**
8.	<b>Ukupno</b>	(..)**

Izvor:Prijava

Analizom navedenih podataka Konkurencijsko vijeće je utvrdilo da zajedničko tržišno učešće učesnika koncentracije na relevantnom tržištu nije veće od 40%, jer će nakon provedbe koncentracije w&p Milos KB preuzeti tržišno učešće od House Milosa (Tabela 1.) na tržištu betona, dok će na tržištu kamena za gradnju (kamenih agregata) doći do zamjene pozicija na tržištu, odnosno tržišno učešće House Milosa će se smanjiti za (..)\*\*\*, dok će se za istu vrijednost povećati učešće w&p Milos KB (Tabela 2.).

## 6. Obaveza prijave namjere koncentracije

Obaveza prijave koncentracije privrednih subjekata, u smislu člana 14. stav (1) tačke a) i b) Zakona, postoji ako ukupni godišnji prihodi učesnika koncentracije ostvareni prodajom roba i/ili usluga na svjetskom nivou iznose 100.000.000,00 KM, po završnom računu u godini koja je prethodila predmetnoj koncentraciji i da ukupan prihod svakog od najmanje dva privredna subjekta učesnika koncentracije ostvarena prodajom roba i/ili usluga na tržištu Bosne i Hercegovine iznosi najmanje 8.000.000,00 KM, ili ako je zajednički tržišni udio učesnika koncentracije na relevantnom tržištu veći od 40,0%.

Ukupni godišnji prihodi privrednih subjekata učesnika koncentracije (i njihovih povezanih privrednih subjekata), na dan 31. decembar 2011. godine:

Tabela 3.

	<b>w&amp;p Milos KB</b>	<b>House Milos</b>	<b>House Milos (dio predmetne koncentracije)</b>	<b>w&amp;p Baustoffe GmbH</b>
<b>Svijet</b>	-	-		(..)**
<b>BiH</b>	(..)**	(..)**	(..)**	-

Izvor: Podaci iz Prijave

Godišnji prihod učesnika koncentracije predstavlja ukupan prihod (bez poreza na dodatu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 8. tačka h) Odluke o načinu podnošenja prijave i kriterija za ocjenu koncentracija privrednih subjekata.

Članom 14. stav (3) Zakona je utvrđeno da u slučaju da se koncentracija odnosi na spajanje ili pripajanje dijela ili dijelova jednog ili više privrednih subjekata, bez obzira da li ti dijelovi imaju status pravnog lica, pri izračunavanju prihoda, obračunavat će se samo prihod onih dijelova privrednog subjekata koji su predmet kontrole koncentracije.

Analizom navedenih podataka utvrđeno je da učesnici predmetne koncentracije ne ispunjavaju uslove iz člana 14. stav (1) tačka b) Zakona jer ukupan prihod privrednog subjekata w&p Milos KB ostvaren prodajom roba i/ili usluga na tržištu Bosne i Hercegovine iznosi manje od 8.000.000,00 KM (Tabela 3.), a zajednički tržišni udio učesnika koncentracije na relevantnom tržištu nije veći od 40,0%.

Na osnovu naprijed navedenog, utvrđeno je da privredni subjekt w&p Milos KB nije bio obavezan podnijeti prijavu koncentracije.

## 7. Administrativna taksa

Podnosilac prijave na ovaj Zaključak, u skladu sa članom 2. tarifni broj 108. tačka c) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», br. 30/06 i 18/11) je dužan platiti administrativnu taksu u ukupnom iznosu od 1.000,00 KM u korist Budžeta institucija Bosne i Hercegovine.

## 8. Pouka o pravnom lijeku

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Zaključka.

**Predsjednica  
Gordana Živković**

Dostaviti:

- Podnosiocu prijave putem punomoćnika
- u spis
- a/a